

## UMS Jadi Universiti Pertama di Malaysia Tubuh C4D

Terakhir dikemaskini: Jumaat, 17 Mei 2019 09:41 | [Cetak](#) | Jumlah paparan: 242

Kongsi 0

Syorkan 0

Kongsi

Tweet

Share



JUMAAT, 17 MEI - Universiti Malaysia Sabah (UMS) menjadi universiti pertama di Malaysia menubuhkan Unit Penyelidikan Komunikasi Pembangunan UMS-UNICEF (C4D), dan merupakan universiti kedua dalam kalangan negara ASEAN selepas

Dhurakij Pundit University Bangkok, Thailand.

Penubuhan unit tersebut merupakan hasil daripada perjanjian kerjasama di antara UMS dan United Nations Children's Fund (UNICEF) yang ditandatangani oleh Naib Canselor UMS, Profesor Datuk Dr. D Kamarudin D Mudin bersama Timbalan Wakil UNICEF di Malaysia, Rodaslaw Rzehak di Pejabat Naib Canselor, di sini, semalam.

Datuk Dr. D Kamarudin dalam satu kenyataan hari ini berkata melalui perjanjian tersebut, UMS akan menyediakan ruang operasi dan sumber manusia yang terdiri daripada ahli akademik, manakala UNICEF menyediakan dana permulaan serta kepakaran sedia ada.

“Antara tujuan penubuhan C4D termasuklah menjalankan penyelidikan tindakan tentang isu berkaitan wanita dan kanak-kanak bagi mewujudkan kerangka tindakan yang sesuai, menyediakan khidmat perundingan dan latihan serta mewujudkan jaringan kerjasama dalam penyediaan sokongan teknikal.

“Selain itu, unit ini juga akan mempromosikan penggunaan C4D sebagai cross-cutting strategy dalam pelaksanaan projek pembangunan sosial dan menjadi rakan kongsi pilihan oleh agensi yang memerlukan khidmat C4D,” ujarnya.

Menurut Datuk Dr. D Kamarudin, UNICEF juga turut menyediakan dana permulaan bernilai lebih RM300,000 untuk tujuan latihan dan pembangunan kapasiti serta isu-isu berkaitan wanita dan kanak-kanak.

“Kita berterima kasih kepada UNICEF kerana memilih UMS sebagai rakan strategik untuk penubuhan unit ini. Kita juga mengalu-alukan kerjasama daripada mana-mana pihak industri pada masa akan datang,” tambahnya.

C4D merupakan satu penggunaan pendekatan komunikasi dalam menyokong projek pembangunan sosial termasuk pertanian, pendidikan, kesihatan dan pembasmian kemiskinan.